

# Figli di un Dio minore... (Vernacolo Catanzarese)

Data: 9 dicembre 2019 | Autore: Salvatore Procopio



## CATANZARO, 12 SETTEMBRE -

Certi voti u titulu d'icia tuttu... atri voti on d'icia nenta... e sulu cu si vitta u film... pò capiscira chiddhu cchi vogghiu ma dicu!!!

Ma... cca... u signura... on c'inthra nenta... a curpa esta e nui atri...

A paroli... simu tutti bravi...

A paroli... comu vidimu nu postu machina riservatu alli disabili... tiramu diritti... poi tornamu a fara u giru nu paru e voti... e dicimu...

"- ma tantu... a machina d'assu n'attimeddu... pozzu pensara ca propriu mo passa n'handicappatu!!!

- e poi... duva sunnu tutti st'handicappati!!! - c'è sunnu cchiu posti machina ppe l'handicappati ca ppe nui"

A paroli... quando vidimu nu cristianu e chissi... voleramu ma facimu nc'una cosa ppe solidarietà... ma non ni moticamu mai...

A paroli...

U gestu cchiu semplicia... ppe nui... diventa n'impresa ardua... ppe iddhi...

Ma si lavanu... ppe nui... si pettinannu i capiddhi... ma tenanu na forchetta n'te mani...

o... ma si linchianu nu bicchera d'acqua... ppe nui... si mintanu nu magliona o ma s'abbuttunanu na cammisa...

ppe nomma parramu poi e cosi cchiu m'pegnativi... ca non vala mancu a pena ma vi cuntutu!!!

Cchi n'da vonnu sapira chiddhi cchi... on'hannu nu zianu... nu neputa... nu frata... na soru... cchi on'ava n'cunu problema!!!

Ancora ojia... quandu n'cunu... ava n'ta casa... na perzuna ccu nu problema particolare... si... na perzuna ccu n'handicap... senti dira...

"- *mammareddha a vidisti disgrazia cchi cci vinna!!!*

- *hannu chiddha crucia e figghiu!!!*

- *on'tavvicinara a iddhu... omm'avissa ma t'imbisca n'cuna cosa!!!*

No... amici mei...

nu figghiu...

nu frata...

na soru...

cchi hannu nu qualsiasi problema...

on sunnu mai na disgrazia...

on sunnu mai na crucia...

sunnu sempra figghi do stessu Diu cchi ficia a vui!!!

On c'esta nu Diu ppe perzuni normali e unu ppe chiddhi menu normali!!!

On c'esta nu Diu maggiore ed unu minora!!!

Comu va pozzu spiegara... a gioia e na figghiola e chissi... mentra si mangia na coppetta e gelatu n'zema allu pathra o allu frata... assettati a nu tavolinu e nu bar!!!

E a vidi... cchi a ogni cucchiarinatha... cci mintu dui minuti ma si gusta chiddhu gelatu... comu si fussera ogni vota l'ultima...

Poi magari u figghiolu do tavolu vicinu u vidhi ciangira... ca non volia chiddhu gustu ma natru... e mammisa mentra torna a jira allu bar... ti passa accantu senza mancu ma ti urta... comu si tu e sorta averavu a pesta!!!

Comu va pozzu spiegara a felicità e na mamma... mentra cci fa fara nu giru alla giostrina de picciuliddhi... alla figghia sua... cchi magari nd'ava cinquanta... ma si comporta comu si nd'avera cinqu!!!

E mentra a giostrina va... mammisa cerca ad ogni giru... ppe n'crocia u sguardo felicia da figghia... e l'occhi soi si linchianu e lacrimi... pensandu comu basta pocu... ma veramenta pocu ma a fa cuntenta...

Tranquilli...

Sti perzuni... i potiti toccara... on su contagiosi comu n'apestatu!!!

Sti perzuni... i potiti abbrazzara... on'azzanaru comu nu Leona!!!

Sti perzuni... i potiti vasara... on su velenosi comu na vipera!!!

Ma u sapiti comu si po' sentira nu guagliuneddhu e chissi... quandu alla scola... l'atri picciuliddhi o i mammi loru... oll'invitanu alli festiceddhi de compleanni!!!

E non vi dicu comu si ponnu sentira i genitori stessi...

Già nui randi... cchi ni definimu normali... na pigghiamu quandu n'amicu nosthru nescia ccu natru... senza ma ni chiama!!! Figurativi na guagliuna e chissi quandu vena isolata!!!

Ppe fortuna... ca tanti genti bboni c'è sunnu puru... cchi si dedicannu ma fannu volontariatu e cchi si pigghianu cura... e sti perzuni ccu tuttu u cora...

Certi cosi... certi emozioni on si ponnu spiegara... ieranu vissuti...

ma non penzu... ca ci fussera n'cunu cchi volera ma si goda n'emoziona simila...

Anzi... e cchiu facila cchi cci senti dira...  
"n'grazia a Diu... ca a mia... mu mandau bonu!!!"

(... la gioia dei tuoi occhi... è la mia felicità)

**Salvatore Procopio**

---

Articolo scaricato da [www.infooggi.it](http://www.infooggi.it)  
<https://www.infooggi.it/articolo/figli-di-un-dio-minore/116050>

